

李文忠公全書

奏稿

李忠節公奏議卷十三

奏查看黃河尾閘形勢擬由蕭神廟入海并將趙家菜園呂

家窪漫口堵合摺

光緒二十二年九月十一日

奏爲查看黃河尾閘形勢擬由舊黃河東岸挑挖新河仍導入蕭神廟舊河入海並將趙家菜園呂家窪漫口次第堵合謹繪圖貼說恭摺具陳仰祈 聖鑒事竊臣前因察看海口於五月舟赴下

游維時呂家窪口門至陳家屋子溜勢甚旺擬從陳家屋子掘開西竈壩導入鐵門關迤下舊河入海嗣因趙家菜園決口水由東北土塘順流而下與呂家窪漫水合而北注形勢已有變遷擬俟伏秋汎過再察看情形辦理業經先後 奏明在案臣此次舟至

趙家菜園易坐小舟從口門溜勢經行之處順流而下至霑化縣屬之澤河復由澤河沿慶定溝汭流而上至呂家窪口門往復周巡詳加察看趙家菜園之水由左家莊經邢家南窪後窪等莊直趨利國鎮刷開王家小河流入澤河又東行一股至季家屋子與呂家窪之水會合由慶定溝匯入澤河查澤河即徒駭河下游自黃水入澤之處至海口四十餘里由此入海本極通暢惟上游商河惠民濱州等州縣之水皆以澤河爲尾閭再增黃水由此入海勢不能容必至漫溢爲患此趙家菜園亟宜堵合之情形也呂家窪之水其正溜先由八里莊迤北折而東行過豐國鎮至陳家屋子復折而東北由鹽灘之納潮溝入海自陳家屋子以下溜勢漸

微故臣前請掘開竈壩歸入舊河迨趙家菜園決口水至季家屋子合而爲一掣動大溜挾以北趨至慶定溝流入泇河現在水向西行其口門東壩至陳家屋子均已淤成平陸若仍照前議須由口門至陳家屋子平地挑挖工鉅費繁且口門迤東新淤之處均係嫩灘將來築隄亦難堅實臣於五月十七日摺內以黃河溜勢靡定不可以人力爭即此可見惟泇河旣實不能容則此處西行之水亦應堵塞而韓家垣河流復不能暢又無宣洩之方此呂家窪不可不堵而又不能遽堵之情形也臣查舊黃河自蕭神廟以下地勢愈低入海之路本無逾於此者惟陳家屋子以上淤地旣難挑挖若將正河攔黃壩掘斷水循舊河而下則歷年遷居河身

民戶鱗次櫛比又無地可以安插臣復從舊河兩岸逐處相度查東岸竈壩以外地皆平衍並無居民如水由此處經行其勢甚順現擬於舊攔黃壩迤東韓家垣之上開挖新河一道計十七里有奇至李家竈將竈壩掘開又三里有奇至平字灘接入舊黃河再將舊河身高仰之處約近二十里擇要加挑至牡蠣嘴以下深處爲止於李家竈之下從東竈壩起斜築格隄一道計長七里有奇接至西竈壩止以防黃水入河倒灌爲患其河身內所居民戶無多另行擇地遷徙復查呂家窪口門對岸臣六月內所挑引河勢尙通順擬再從引河上添挖引河一道須較前挑引河更加寬深復從呂家窪口門上岸建築攔黃大壩將大溜逼入引河則呂家

窪西口亦可挂淤再將口門堵合使正溜全歸新河由蕭神廟迤
下入海其韓家垣舊河擬留作減水支河盛漲時亦可爲分洩之
路綜計趙家菜園堵口呂家窪以下空河築隄及堵塞呂家窪漫
口工程浩大需費甚鉅臣督飭核實勘估力從減省處計算擬請
撥銀二十萬兩即飭定期開工次第興辦如將來款項實在不敷
再行 奏請添撥臣當慎選廉幹素著向無習氣之員認真舉辦
總期工歸實用款不虛糜仰副 聖主慎重河防實事求是之至
意所有察看黃河尾閘擬將舊河東岸挑挖新河仍導入蕭神廟
舊河入海並將趙家菜園呂家窪漫口次第堵合緣由謹專摺具
陳並繪圖貼說恭呈 御覽伏乞 皇上聖鑒訓示臣查勘事竣

於八月二十九日由利津折回九月初五日抵省合併陳明謹

奏 光緒二十二年十月初二日奉 硃批另有旨圖留覽欽此

奏節屆霜降黃河一律安瀾摺

光緒二十二年九月二十三日

奏爲節屆霜降秋汎期內黃河一律安瀾恭摺具陳仰祈 聖鑒

事竊查節交白露上中下三游河防搶護平穩情形經臣於八月

初五日 奏報在案往年白露以後黃河即漸消落今歲秋汎之

大有逾伏汎至九月節交寒露河水猶增漲不已以致險工迭出

岌岌可危如上游之靳莊孫樓紅廟等處埽壩蟄陷高家大廟合

龍處之護沿埽亦被漂沒中游之黃陡崖枯河程官莊等處魚鱗

埽皆平蟄入水胡家岸淤灘殘埧冲刷殆盡水齧隄根下游自歸

仁鎮至清河鎮新舊埽壩一百九十餘段入水者已十分之八均
紮柳枕攬溜用雜草填鋪後塘潘三莊王棗家邵家等處尤爲極
險邵家隄身刷去三十餘丈隄後漸至裂縫其他險要各工不可
枚舉經三游各總辦督率營委各員奮力搶廂隨時設法補救茲
幸節交霜降各工俱慶安瀾堪以仰慰 宸厪伏查山東河工河

窄隄卑時時有盈滿之患下游因尾閘不暢水勢更見擡高本年
五月伏汛初臨趙家菜園即至漫決迨秋汛期內黃水暴漲其水
與隄平之處於隄頂上搶修子埝而驚濤駭浪或濺過隄頂或刷
塌隄身其危險情形幾至無可措手仰賴 聖主洪福 河神默
佑得以化險爲夷微臣實深寅畏相應懇 恩頒發大藏香由臣

祇領恭詣 大王廟祀謝以答 神庥刻下節過霜清水勢漸定
仍未大見消落臣當督飭各總辦隨機修守妥慎經營以仰副
朝廷慎重河防至意所有節屆霜降黃河一律安瀾緣由理合恭
摺具 奏伏乞 皇上聖鑒訓示謹 奏 光緒二十二年十月
十一日奉 硃批另有旨欽此

奏山東境內南運河工程請仍歸河督經理摺 光緒二十二

年九月二十六日

奏爲山東境內南運河工程請仍歸河臣經理恭摺具陳仰祈
聖鑒事竊查東境南運河工程前以歲久失修處處堙圯臣上年
巡閱黃河順道履勘目觀敝壞情形亟思設法整頓因念河臣遠

駐豫省工員無地方之責於民生利害漠不關心擬將修濬工程由東省暫行試辦於上年十二月奏奉 諭旨交部議奏本年二月復因署河臣任道鎔尙未到任爲期已促恐致後時復奏申前請奉 旨俞允旋准工部議覆暫歸東省委員經理俟河督到任後統籌全局何者宜歸河督何者宜歸東撫令與河臣會商辦理等因奏奉 諭旨依議欽此欽遵咨行到臣伏查南運河工程向由河臣督飭運河道廳暨沿河各州縣分任辦理光緒十七年改爲委員承辦而所用工需如冬挑例津二價及歲修另案各款共銀九萬餘兩俱由東省司庫撥解逐年因司庫款項不充歲撥銀七萬餘兩使能工歸實用經費本自裕如乃工員積習相沿類多

草率敷衍河身從未深挑隄埝任其殘缺每至重運屆臨始間段黏補而河淤太甚水不能容漕船隨過隨決重運僅能無誤而民生之昏墊已不堪言臣奏明後飭委候選道馬開玉分省補用

知府李祐自十里堡黃河入運起至嶧縣黃林莊出東境止五百餘里中應修應挑工段逐一勘估興工始以工鉅費繁恐例款尙不敷用曾於兩次摺內陳明擬另行設法撥補嗣經馬開玉等核實舉辦任勞任怨絲毫不使虛糜工竣核算祇用銀六萬五千九百餘兩比照往年例銷銀款尙節省幾及三萬兩之多而河道一律深通加以上年高家大廟決口灌入安山至十里堡四十里間多半淤成平陸亦均挑濬通暢較往年工程又多至數倍經此次

大修之後來年但擇要加修即可事半功倍款項亦大可節省惟此項工程本向歸河臣辦理署河臣任道鎔亦深鑒從前積弊前准函稱欲蠲除痼疾規復舊制擬霜清後即赴濟甯籌辦自應將一切修濬事宜統歸辦理由河臣核實工料力加整頓但工程盡在東境漕運所關亦民生休戚所繫臣仍當不分畛域隨時籌商仰副 朝廷慎重要工至意所有東境南運河工程仍歸河臣辦理緣由謹會同河東河道總督臣任道鎔恭摺具 奏伏乞 皇上聖鑒訓示謹 奏 光緒二十二年十月十二日奉 硃批該部知道欽此

奏請將督辦南運河工之候選道馬開玉等獎敘片 光緒二

十二年九月二十六日

再運河經由東境七百餘里自黃水穿運以來北岸由東阿陶成堡至臨清入衛計二百餘里爲北運河南岸自東平十里堡至嶧縣黃林莊出境計五百餘里爲南運河北運河今年因伏汎過小頗形阻滯而南運河五百餘里中節節淤淺亦稱難治兼以上年高家大廟決口自安山以北至十里堡一帶淤成平陸隄身更殘缺不堪臣於上年十二月 奏請歸東省試辦至本年二月始奉部覆飭委候選道馬開玉分省補用知府李祐迅速估辦方慮工程繁鉅恐致後時賴馬開玉等核實經營嚴督在工文武各員併力興修用款省而程功速迨重運經臨暢行無阻據江安糧道馬

恩培呈報運隄卑薄者既築修高厚河身淤淺者亦疏濬深通辦理甚爲得法此前數年未有之事等語實屬著有微勞合無仰懇天恩將二品頂戴候選道馬開玉三品銜道員用分省補用知府李祐俯准交部從優議敘以昭激勸出自鴻慈謹附片具奏伏乞聖鑒訓示謹奏
光緒二十二年十月十二日奉硃批著照所請該部知道欽此

奏陳山東河工未能確有把握情形摺

光緒二十二年十月十五日

奏爲欽奉

諭旨謹將辦理山東河工未能確有把握情形恭摺

瀝陳仰祈

聖鑒事竊臣於九月二十四日承准軍機大臣字寄

光緒二十二年九月二十一日奉

上諭李秉衡奏查看黃河尾

閭形勢擬由舊黃河東岸挑挖新河仍導入蕭神廟舊河入海並
將趙家菜園呂家窪漫口次第堵合繪圖呈覽一摺覽奏均悉即
著照所擬辦理惟所開新河大溜引入之後能否通暢從前沖壞
鹽灘能否一律涸出蕭神廟一帶產鹽處所是否不致另有窒礙
該撫統轄東省全河責無旁貸經此次改歸舊河入海大舉興辦
之後務使一勞永逸方爲不負委任如仍未能妥洽惟該撫是問
等因欽此仰見 聖慮周詳實事求是跪誦之下悚惕莫名臣仰
荷 天恩畀以重任苟有一得之愚敢不竭力圖維求經久不敝
之法惟治河古無善策而治山東今日之河則尤無善策如謂一
經舉辦即可一勞永逸臣實不敢輕言自任於 君父之前致蹈

欺飾之咎伏查治河之法見之載籍者甚詳即光緒九年十年之間山東河決數十處中外臣工條陳河務者先後十餘人撮其大要約有四端曰展寬河身也疏濬河淤也開通支河以減水也築隄束水以攻沙也此四者皆治河之要領而山東則有難於施行及行之而未能見效者請爲我 皇上敬陳之豫省河隄兩岸相去遠或三四十里近或一二十里水得遂其蕩漾之性故爲患較少東省自黃河奪濟愈下愈狹民間築埝自衛寬者一二里隘者不及一里一遇汎漲漫決頻仍言者遂多主築遙隄不守民埝之議然濟武兩郡地狹民稠沿河村鎮廬墓不可數計兼以齊河濟陽齊東蒲臺利津等縣城皆近臨河干一聞民埝不守人心惶懼

震駭非常當時部臣亦以數十萬生靈恐歸淪沒未敢議准後雖興築大隄仍將齊河以下民埝改爲官守此展寬河身之難也疏濬之法代有制作迄無推行盡善之方光緒十年前倉場侍郎臣游百川前撫臣陳士杰仿河臣靳輔遺法奏明用船隻拖帶鐵篴子混江龍等具上下疏刷卒以笨重難行未能見效十三年前撫臣張曜復定購法國挖泥機器船嗣在利津太平灣及天津蠻子營試驗僅能吸水不能挖泥遂復退還良由黃水渾濁挾泥帶沙機器旣難旋轉且濬河器具輕則入水不深未能得力重則陷入泥底行駛維艱均之難收實效海口則潮汐往來之處率皆軟泥不能立足人力亦無所施此疏濬河淤之難也凡物合則見多分